



ज्वाजलपा बाह्यो

JWOJALAPA NEPALBHASA WEEKLY

दैं ६ ल्या: ३६ (पूर्णडक ८८) ने. सं. ११३६ चिल्लागा चौथि आइतवा: २०७२ चैत्र १४ गते आइतवार (Mar- 27, 2016)

मू ८।-

मंका: संघर्ष समिति लच्छि तक सुंक च्वनीगु ख: ला ?

- सर्वसाधारणत वक्ता
- सतक विस्तारं पीडित नेवा:तयगु विशेष उपस्थिति

नेवा: स्वायत राज्य मंका: संघर्ष समितिं शनिवा: यैय् 'आ:या राजनितिक अवस्था व पहिचानया सवाल' विषययात कया: विचा: मुंज्या यात ।

संघर्ष समितिया बर्तमान नाय: मोहन बहादुर मर्हजनया सपापतित्वय् जुगु उगु ज्याभवलय् यै, यल, ख्वप, टोखा, सक्व, थक्वा:या लिसै थीथी नेवा: लागया नेवा:त उपस्थित जुगु ख: । ज्याभवलय् संघर्ष समितिं संघर्ष यायेमा:गु, सडक विस्तारया विरोध यायेमा:गु व पहिचान

सहितया संघियताया नितिं संघर्ष न्याकेमा:गुया लिसै थीथी विचा: ज्याभवलय् उपस्थित जुपिन्स न्यव्व:गु ख: ।

थये न्यव्व:गु थीथी विचा:यात कया: संघर्ष समितिया दुज: लिसै नेवा: देय् दवूया नाय: नरेश ताम्राकारं समितिया विचा: न्यव्वयादीगु ख: । ज्याभवलय् पूर्व मन्त्री डा. मंगलसिद्धि मानन्धरं नुग: खँ तयादीगु ख:सा ज्याभव: समितिया मेम्ह दुज: मनोज नेवा: खड्गीं न्याकादीगु ख: ।

मंका: संघर्ष समितिं न्हापा लिपासिवे व्यागलं कथं जुइक ज्याभव: या:गु ख: । मंका: संघर्ष समितिया नेतृत्वसिवे नं नेवा: सर्वसाधारणया खँ न्यनेगु कथंया ज्याभव: या:गु ख: ।

नेवा: आन्दोलन नापं पहिचानया पक्षय् दुपिं नेवा: सर्वसाधारण मनूतय्सं थौया इलय् मंका: संघर्ष समितिं मा:गु कथंया ज्याभव: पित मबिउगु, पहिचानया मुद्दायात कया सशक्त कथं ल्हवने मफुगु नापं थीथी कथंया विचा: प्वकादीगु ख: ।



नेवा:तयगु भावनायात थुइका वने मा:गु अले जारी जूगु संविधानय् नेवा:तयगु अधिकार मदुगु खँयात कया गां गामय् नापं त्वा: त्वालय् वना थुइक: वनेमा:गु खँय् ब: विचादीगु ख: । विपेश याना सतक विस्तारं पीडितपिं उपस्थिति जूगु अवस्थाय् वयक:पिन्सं विकासया नामय् थपिं पीडित जुयाच्चंगुलिं मंका: संघर्ष

समितिं मा:गु पला: ल्हवनेमा:गु खँय् ब: विचादीगु ख: । सतक पीडितया ल्याखं टोखानिसं कलंक-नागहुंगा लागया नेवा:तयगु व्यापक उपस्थिति दुगु ख:सा मंका: संघर्ष समितिं धा:सा आ: सचिवालयया कजि मल्ल के सुन्दर अमेरिकां लिहां वयादी थुंका: ज्याभव: हयेगु जुइ धा:गु दु । मल्ल के सुन्दर निक्व:गु विश्व

नेवा: सम्मेलनय् मूपाहां जुया भायादीगु मल्ल अन लच्छि तक च्वनादी । उकिं वयकलं नेपालभाषा एकेडेमिया सदस्य सचिव पदया भाला प्रा. प्रेमशान्ति तुलाधारयात विचा वनादीगु ख:सा आ: लच्छि तक वयक: मल्ल मदुगु अवस्थाय् मंका: संघर्ष समिति सुंक च्वनीगु ख: ला धका: मनूतय्सं न्हयस: तयाह:गु दु ।

विश्व नेवा: संगठनया न्हूम्ह नाय: श्रेष्ठ



विश्व नेवा: सम्मेलनया आइतवार अमेरिकाया ईकथं चान्हय् १:३० ता इलय् क्वचा:गु न्हापांगु चरणया ज्याभव: कथं विश्व नेवा: सम्मेलनया नाय: पदय् सिजन श्रेष्ठ निर्विरोध निर्वाचित जुगु दु ।

अथेहे, वरिष्ठ उपाध्यक्ष दयारत्न शाक्य, स्ययम्भूधर तुलाधर व डा. नारायण राजभण्डारीपिं नं निर्विरोध निर्वाचित जुगु दु । अथेहे,

मूछ्याञ्जे सुभाषराम प्रजापति व जनसम्पर्क दुजलय् कृष्ण चखु निर्वाचित जूगु दुसा दुजलय् राजेश श्रेष्ठ निर्वाचित जूगु दु ।

न्हूम्ह नाय: सिजन श्रेष्ठ न्हयम्ह केन्द्रीय पदाधिकारीपिं चयन जूगु आ: मुक्कं फिमह थीथी व्यक्तिपिं मनोनित याना: फिमहेम्हसिगु केन्द्रीय समिति जुइगु जानकारी बियादिल । विश्व नेवा: सम्मेलनया निन्हुया



ज्याभव: आइतवा: क्वचा:गु दु । अमेरिकाया बाल्टिमोरय् थुगुसीया सम्मेलन जूगु ख: ।

आवश्यकता

यस आस्था वचत तथा ऋण सहकारी संस्था लि. को लागि तपशिल बमोजिमको कर्मचारी आवश्यक परेको हुँदा इच्छुक नेपाली उम्मेदवारले २०७२/१२/१८ गते भित्र दरखास्त दिनुहुन अनुरोध गरिन्छ ।

तपशिल

पद	संख्या	योग्यता
१) क्यासियर	एक	प्लस टू वा सो सरह

ग्राह्यता: विवाहित महिलालाई विशेष ग्राह्यता दिइने छ ।

तलब

आपसी

समझादारीमा




सम्पर्क नं.

०१४३३६३९४

आस्था वचत तथा ऋण सहकारी संस्था लिमिटेड

नयाँ बजार, कीर्तिपुर-१७



सल्लाहकार
श्रीकृष्ण महर्जन
प्रकाशकः
नजरराम महर्जन
सम्पादक
श्रीकृष्ण तण्डुकार
ले-आउटः
ज्वजलपा डेस्कटप
संवाददाता
भरत महर्जन, निरजमान सिंह
थाकू
प्रिन्ट स्काई, यें
ज्याकू: निखासी त्वा: किपू नपा-३
फोन ल्या: ४३३३००७, ९८४९४०९०७७
ई-मेल : kirtipursandeshe@live.com

सम्पादकिय

विश्व नेवाः संगठनं विश्व न्यंकया
नेवाःतयूत संगठित यायेमाः

विश्वया नेवाःतय्गु न्हापांगु सम्मेलन बेलाय्त थनि न्यादँ न्ह्यः
जूगु खः । अबले मुक्कं याना खगू देशय् च्वनाच्चापिं नेवाःतय्सं जक
ब्बति काःगु खःसा थुगुसी धाःसा भिस्वंगू देशया नेवाःतय्सं ब्वति
काःगु दु । थुगु ल्याखं स्वल धाःसा न्हापाया तुलनाय् थुगुसी अप्वः देय्या
नेवाःतय्सं सहभागीता जूगु दु । अबलेया सम्मेलनं डा. बालगोपाल
श्रेष्ठयात नेतृत्वय् ज्यासना पुचः ल्यःगु खःसा थुगुसी अमेरिकाय् जूगु
निक्वःगु विश्व नेवाः सम्मेलनं नायः पदय् सिजन श्रेष्ठ निर्विरोध
निर्वाचित जयादीगु खः ।

सामान्यतया विश्वया छु छु मुलुकय् नेपाःमित दु अन अन नेवाःत दु । अप्वः देशय् ला दक्ते न्हापां थ्यपिं नेपाःमि धइगु हे नेवाःत खः । आः तकया दुने फिस्बंगू देशं जक सहभागी जूगु विश्व सम्मेलन व विश्व नेवाः संगठनयात विश्वन्यंकं च्वपिं नेवाःतय्त संगठित याये फयेमाः ।

विश्वया नेवाःतयत् संगठित यायेगु धइगु मुल रुपं नेपालय्
नेवाःतय्गु म्हसीका ल्यंका तयेगु नितिं भूमिका म्हितेगु, माःगु कथंया सः
ध्वयेकेगु नाप नापं स्वनिगःया नेवाःतय्गु हक अधिकारयात माःगु कथं
ग्वहालि यायेगु नितिं नं जुइमाः । उकिं थुगुसी वःगु न्हूगु नेतृत्व अवश्य
नं नेपाःया वर्तमान राजनीतिक अवस्थायात थुइका माःगु कथंया सः
ध्वयेकेगु ज्या याइ धकाः स्वनिगःया आदिवासी नेवाःतय्सं आशा
यानाच्चंगु अवस्था द ।

साहित्य / चिनाखँ

हार्दिक शौरभ शाक्यया

शौरभ शाक्य

रूप

२५. वैंय् चाःगु नाका
हूवःगु नाकबन्दी
प्वाःगं धरना ।
२६. कःलि फसंपू
सरकार बुँख्याःचा
फुस्लूगु सत्ता ।
२७. बलूगु खुसि
इर्पाँथिर्पाँ न्याचात
क्वःया म्हतली ।

२८. ख्वाउँया हिलं
व्वःव्वःस्या छक्कू जः
पूगाःगु किसि ।
२९. वया मंतुना
फुदंक्क ग्वारामरि
मरुइ लिक्क ।
३०. मसान क्वल
जीवन छगू शुन्य
नौ नौ व्वदन ।

नृग संविधानय् भीगु असहमति छु ?



राजेन्द्र श्रेष्ठ

ल्यू नायः ससफो नेपाल
न्हापाया ल्यंगु
१८. धारा ८४ : उपधारा १ स
प्रतिनिधि सभाय समानुपातिक पाखेंया
प्रतिनिधित्व ४० प्रतिशतय् व्वकाःगु
दु । थुगु सन्दर्भय् पुलांगु ६० प्रतिशत
समानुपातिकया व्यवस्था कायम यानाः
निर्वाचन प्रणालीइ मिश्रित सदस्यीय
समानुपातिक (क्षतिपूर्तीय) निर्वाचन
प्रणाली वा पूर्ण रुपं सूची समानुपातिक
व्यवस्था छ्यलेमाः । धारा १७५ या प्रदेश
सभाया तीस्वनेगुलि नं थथेहे व्यवस्था
जुइमाः । अथेहे धारा ४० (२) व १७५
(६) स खस आर्ययात जक सवैधानिक
रुपं पहिचान व्यूगु दु । थुकियात चीकाः
फुक्क समुदायया पहिचान अनुसूचीइ
तयेगु वा संघीय कानूनय् न्ह्यथनेगु
व्यवस्था यायेमाः । ऐतिहासिक पृष्ठभूमिया
आधारय् खस व आर्यया व्यागलं पहिचान
स्थापित यायेमाः ।
१९. धारा ८६ (२) : राष्ट्रिय सभायात
छुं सिट प्रत्येक प्रदेशपाखें समान ल्याः
बियाः ल्यंदूगु समुदायगत जनसंख्याया
आधारय् प्रतिनिधित्व याकेगु कथं मूलतः
थुकियात जातीय सभा (House of
Nationalities)या रुपं स्थापित
यायेमाः । थ्व प्रदेशया स्वायत्तताया र
क्षाया नितिं स्थापित जुइगु सभा जूगुलिं
थुकिया निर्वाचन प्रदेशया व्यवस्थापिका
वा प्रत्यक्ष निर्वाचन जुइमाः ।

२०. धारा ९१ (२) : प्रतिनिधि सभाया
सभामुख व उपसभामुख मध्ये छद्म मित्ता
जुडमाःगु व्यवस्था दु । तर फरक प्रदेश
व समुदायया जुडमाःगु व्यवस्था याःगु
मदु । थथेहे व्यवस्था धारा ९२ (२) या
राष्ट्रिय सभा व धारा १८२ या प्रदेश
सभातयके न लागु जुडमाः ।

२९. धारा १०० (४) : थुगु धाराय
प्रधानमन्त्रीयात निर्देतक अविश्वासया
प्रस्ताव तयेमदइगु व प्रधानमन्त्रीं नं संसद
भंग यायेमदइगु व्यवस्था या:गु दु ।
संसदीय व्यवस्था धयागु संसदया
सर्वोच्चता दूगु व्यवस्था खः । य्वहे
व्यवस्था छ्यलेगु खःसा उकिया मर्म अखः
निर्देतक अविश्वासया प्रस्ताव तयेमदइगु
व प्रधानमन्त्रीं नं संसद विघटन
यायेमदइगु प्रावधान चीकेमाः ।

२२. भाग ११: थुगु व्वय्
न्यायपालिकाया शीर्षक्य् व्यवस्थापिका
व कार्यपालिकाय्थें संघीय शब्द तयातःगु
मदु । व्यवस्थापिका व कार्यपालिका
संघीय तर न्यायपालिका एकीकृत/
एकात्मक जुड्मज्यू । थुकी अन्तर्निहित
आसय प्रदेश व्यवस्थापिका व

कार्यपालिकाया निर्णय केन्द्रं अःखः याइगु
जूगु दु । थुज्वःगु अविश्वासया लकस
अन्त्य यायेत न्ह्यथनातःगु शीर्षक संघीय
न्यायपालिका तयेमाः ।

२३. धारा १२७ (१) : अदालतया स्वंगूगु तहया रुपं जिल्ला अदालतया व्यवस्था याःगु दु । एकात्मक राज्यया प्रशासनिक जिल्लाया आधारय् जिल्ला अदालतया व्यवस्था यायेगु एकात्मकवादी सोच खः । उकिं थुकिया पलेसा सुरु अदालतया रुपं स्थानीय अदालतया व्यवस्था यायेमाः । अथेहे स्वायत्त क्षेत्र, संरक्षित क्षेत्र व विशेष क्षेत्रतय्के आदिवासी जनजाति, मुस्लिम नांपया समुदायतय्गु प्रथाजन्य कानून कार्यान्वयन यायेदइगु व्यवस्था जुइमाः ।

२४. धारा १२९ (१) : सर्वोच्च अदालतया प्रधान न्यायधीश व न्यायधीशपनिगु नियुक्ति न्याय परिषदया सिफारिसय राष्ट्रपतिपाखें जुडगु व्यवस्था दु । थुगु व्यवस्थाय समानुपातिक समावेशीया व्यवस्था यानातःगु मद्दु । न्यायपालिकायात संघीय जक मखु उकिया नियुक्ति नं समानुपातिक समावेशी जुडगु व्यवस्था यायेमा । अथेहे धारा १५४ (१) या न्याय सेवा आयोगय नं समानुपातिक समावेशीया व्यवस्था यायेमा ।

२५. धारा १३० (१) : सर्वोच्च अदालतय
छागू संवैधानिक इजलास दइगु व्यवस्था
दु। संघीइ व्यवस्थायू संवैधानिक इजलास
जक मजूसे समानुपातिक समावेशी
प्रतिनिधित्व दूगु संवैधानिक अदालत
दयेकेगु आवश्यक जू। थुजःगु अदालतं
संवैधानिक विवादत, संघ व प्रदेश नापं
अन्तर प्रदेश विवादत, क्षेत्राधिकार व
सीमा विवादत, अन्तर्राष्ट्रिय सन्धितयगु
कार्यान्वयन सम्बन्धी विवाद आदि स्वयेगु
व्यवस्था जुइमाः।

२६. धारा १३९, (२) : प्रदेशतयगु
उच्च अदालत संघीय कानून कथं
नीस्वनेगु व्यवस्था यानातःगु दु । थ
प्रदेश कानून कथं जुइमाः व उकियात
नं अभिलेख अदालतया मान्यता
बिइमाः । उच्च अदालतया सम्बन्धय
मेमेगु कानूनतयगु निर्माण नं केन्द्र यायेगु
व्यवस्था चीकाः प्रेश सभां यायेगु व्यवस्था
यायेमाः । अथेहे धारा १४० य उच्च
अदालतया न्यायाधीश नियुक्ति केन्द्रीय
न्याय परिषद यायेगु व्यवस्थाया पलेसा
उकिया नितिं प्रदेश न्याय परिषदया
व्यवस्था यायेमाः ।

२७. धारा १४४ (२) : उच्च अदालतयात
संघीय कानून कथं सुरु मुद्दा स्वयेगु, पुनर
वेदन न्यनेगु व साधक जाँच यायेगु अधिकार
जक ब्यूगु दु । थुगु अदालतयात नं संघीय
न्याय पालिकाया मान्यता अनुरुप प्रदेश
कानून कथं थःगु क्षेत्राधिकार दुनेया सूचीइ
अन्तिम निर्णय यायेगु अधिकार बिइमाः ।

२८. धारा २३२ (३) : प्रदेश मन्त्रिपरिषद् व प्रदेश सभायात निलम्बन व भंग यायेगु आधारत मध्ये नेपाःया सार्वभौमसत्ता, राष्ट्रियता आदिइ आँच वयेकल

धा:सा धैगु शब्द नं न्यथ्यनात:गु दु। संधीय
राज्यय् सार्वभौम सत्ता केन्द्र व प्रदेशय्
साभेदारी जुइगु व प्रदेशया थ:गु अलग
पहिचान व राष्ट्रियता जुइगु जुया: उकिया
गलत व्याख्याया आधारय् केन्द्र प्रदेशया
व्यवस्थापिका व कार्यपालिकायात निलम्बन
व भंग याये फइ। उकिं थुज्गु अधिकार
केन्द्रयात बिइग पायिछ् जुइमखु।

२९. धारा २३८ (२) : अख्तियार
दुरुपयोग अनुसन्धान आयोगस्य सर्वैधानिक
परिषदया सिफारिसस्य राष्ट्रपतिं छह
अध्यक्ष व प्यह आयुक्तपि नियुक्ति यायेगु
व्यवस्था दु । अथेह धारा २४२ (२) या
लोकसेवा आयोग, धारा २४५ (२) या
निर्वाचन आयोग, धारा २४८ (२) या
मानव अधिकार आयोग, धारा २५२ (२)
या मिसा आयोग, धारा २५८ (२) या
समावेशी आयोग आदिइ नं अथेह व्यवस्था
दु । थुवःगु फुक्क आयोगतय्के
समानुपातिक समावेशी आधारय् नियुक्तिया
व्यवस्था जइमाः ।

३१. धारा २५० : देसया प्राकृतिक
स्रोत व राजस्व बाँडफाँड याइगु र
अष्ट्रिय प्राकृतिक स्रोत व वित्त आयोगय
नं सवैधानिक परिषदया सिफारिसय र
अष्ट्रूपतिं छम्ह अध्यक्ष व प्यम्ह दुजःपिं
दइगु व्यवस्था दु । थुकी केन्द्रया जक
न्याम्ह प्रतिनिधि दइ । देसया प्राकृतिक
स्रोत व राजस्वया न्यायोचित बाँडफाँडया
नितिं थुकी अनिवार्य रुपं प्रदेशया
प्रतिनिधिपिं नं दइगु व्यवस्था यायेमाः ।

३२. धारा २५९ : समावेशी आयोग
खस आर्य, अपांगता जूषिं व्यक्ति, यैनिक
अल्पसंख्यक आदिया जक प्रतिनिधित्व
जुइगु व्यवस्था या:गु दु । ख धारां
समावेशी शब्दया हे अब्ययाख्या या:गु
दु । शुब्ज:गु आयोग्य आदिवासी
जनजाति, शिल्पी/दलित, मधेसी आदि
फुक्क समुदायया प्रतिनिधित्व जुइगु
व्यवस्था यायेमा: ।

३३. धारा २६१-२६४ : आदिवासी जनजाति आयोग, मधेसी आयोग, थारु आयोग, मुस्लिम आयोगयात अधिकार विहिन यानात:गु.दु। मेगु आयोगतयगुथें हे थुगु आयोगतयगु नं संविधानय् हे ज्या, कर्तव्य व अधिकार तोके यायेमा:।

३४. धारा २६७ : नेपाली स्वतन्त्रता, सार्वभौम सत्ता, भौगोलिक अखण्डता, स्वाधीनता व राष्ट्रिय एकताया रक्षाया नितिं समावेशी नेपाली सेनाया छगु संगठन दइगु व्यवस्था दु । संघीय नेपालय सेनाया संगठन न समानुपातिक समावेशी आधारय जुइगु व्यवस्था यायेमा । एकल राष्ट्रिय राज्यया अवधारणायात सेनाया गठनय मापदण्ड दयेके मज्य ।

३० धारा २८२ : नेपाल सरकारं
नियुक्ति याइम्ह राजदूत व विशेष
प्रतिनिधिर्षि समावेशी आधारय् यायेगु
व्यवस्था दु । थुगु पदतय्के नं
समानुपातिक समावेशी जुइमाः । अथेहे
धारा २८३ स संवैधानिक अंग व निकायया
नियुक्तितय्के नं समानुपातिक समावेशी
जुइगु व्यवस्था यायेमाः । शुक्रिया नितिं
धारा २८४ स व्यवस्था जूकथंया
संवैधानिक परिषदय् च्वनीगु देसया उच्च
पदतय्के हे समानुपातिक समावेशी जुइगु
व्यवस्था यायेमाः । कथंहं.....

इन्द्रेणी साँस्कृतिक समाज

किपूया साँस्कृतिक

श्रद्धाञ्जली जुइगु

ज्वजलपा वा:पौ

हरेक दँया चैत्र २० गते किपुली शहिद दिवस हना: वयाच्चंगु दु । शहिद दिवस तःजिक व व्यवस्थित रुपं हनेत किपुली शहिद स्मृति व्यवस्थापन समिति नीस्वनातःगु दु । चैत्र २० गते शहिद प्रतिमास्थल खासीबजारय् मुना: किपू देय् चाहिला हनेगु याना: वयाच्चंगु ख: ।

२०४६ सालया जनआन्दोलनबलय् चैत्र २० गते प्रहरीया गोलिं कया: किपूया प्यम्ह काय्मचात राजेन्द्र महर्जन, राजमान माली, हिराकाजी महर्जन व लनवहादुर महर्जन शहिद जूगु ख: । वहे दियात लुमंका: दँयदसं चैत्र २० गते किपुली थीथी ज्याभव: याना शहिद दिवस हना: वयाच्चंगु ख: ।

उगु दिनय् थुगुसी नं शहिदतय्गु लुमन्ति इन्द्रेणी साँस्कृतिक समाज (इसास) किपू नं साँस्कृतिक ज्याभव: याना: साँस्कृतिक श्रद्धाञ्जली बिइगु जूगु दु । न्हूवजा:, किपूलीच्चंगु मङ्गल उच्च मा.वि.या हलय् बान्धि ३ ता: इलय् याइगु जूगु दु ।

अथेहे युवा खेलकुद समूह, किपूया ग्वसालय् थुगुसी नं सहिद स्मृति कप ब्याडमिन्टन प्रतियोगिता सुर्वासिया ६ खुता: इलय् जनसेवा उच्च मा.वि.या खेलकुद परिसरय् जुइगु दु ।

द लिजेन्ड अफ कीर्तिलक्ष्मी फिल्म क्यन

ता: इलानिसें स्वयेत आयबुयाच्चंगु किपूमित व पृथ्वी नारायण शाहया फौजनाप जूगु लडाईया बारे दय्कातःगु फिल्म कीर्तिपुर - द लिजेन्ड अफ कीर्तिलक्ष्मी थ्वहे वंगु चैत्र १२ व १३ गते निन्हयंक पाँगाया कृष्ण सिनेभिजन हलय् न्यागू शो क्यन । चैत्र १२ गते शुक्रवार न्हिनसिया ११ ता: इलय् व २ ता: इलय् निगू शो, १३ गते शनिवा: स्वंगू शो क्यंगु ख: ।

वंगु चैत्र १२ गते २ ता: ईया फिल्म स्ववनागु ख: । थ्यंमथ्यं निघौ त्या: ई का:गु उगु फिल्म तसकं न्ह्याइपुक, ईवंगु हे मचायक क्वचाल । फिल्मया छम्ह थे छम्ह कलाकारपिनगु अभिनय बांलागु जक मखु, नुगलय् थिइक हे डायलग नं दु ।

उगु प्याखनय् न्हापा नेवा:तसें पुनीगु वस:, मचातसें म्हितीगु घाँयकासा न्ह्यब्वयातःगु तसकं बांला थौकन्हेयापिं त्यासे त्याय्म्ह पिनगु लागि ज्ञानवर्धक जू । थ्व प्याखनय् भी नेवा:त तसकं धर्मय् जा:पिं, धर्म व नियमय् च्वना: लडाई तक ल्वाइपिं तर पृथ्वीनारायण शाह व वया सेनापिं लडाईलय् न्ह्यागु याये ज्यू धका: लडाईया नियमयात वेवास्ता याना न्ह्याथ्ये नं लडाई त्याकेत जुइपिं खनेदु ।

शत्रु थःगु याकप्वालं पिहाँवइ धा:थें किपुली दुने दुहाँवयेत किपूली हे वयेवनेगु याइम्ह छम्ह मिसायात ल्हाली कया: ध्वाखाया खापा चायेका: बिइ । उकिं हे याना: लडाईलय् किपूमित बुइगु ख: । अफ ला गोरखा सेनायाके तोप नं दुगु जुयाच्चन । तोप जक मदुगु जूसा अफ नं त्याके फइमखु । किपूया मिसा मिजं सकलें जाना: गोरखा सेनानाप ल्वा:वःगु क्यनातःगु दु । किपूमित लडाईलय् वूइधुंका: नं कीर्तिलक्ष्मी याकःचां गोरखा सेनाया यक्व जवानतय्त स्यानाब्यूगु दु । कीर्तिलक्ष्मीयाके धनुषवाण फुइवं तरवार ज्वना पिहाँवइ । याकःचित छ्वाखेरं घेराय् तया: ज्वना:



कुना:तइ । कीर्तिलक्ष्मी यात कुनांतःथाय् गोरखाया सेनापतिं वयागु इज्जत कायेत सनीबलय् थःत थःम्हं खुकुरी सुया: सिनावनी । प्याखें क्वचाई । थुगु कथं किपूमीत सिइत तयार जुई तर सुं नं शत्रुया न्ह्योने आत्मसमर्पण मया:गु क्यनातःगु दु । थ्व तसकं बांला:गु सन्देश ख: ।

थ्व प्याखनय् निथाय् स्वथाय् डायलग सेन्सर याना:तःगु सिइदु खँल्हानाच्चंवं हे त्वायक स: वया: खँपु हिलीगु अथे हे स्वयाच्चंवं लू (दृश्य) हिलीगु खनेदु । सायद सेन्सरवोर्ड सेन्सरया:गु जुइमा: ।

थ्व फिल्मय् छगू भतिचा मत्वःगु छगू दु । व ख: वासुपासाया उपन्यास कीर्तिलक्ष्मी ब्वनावलय् वया ब्याहाया खँ जक क्व:ज्यूगु ख: । ब्याहा याये मला:निगु तर थ्व प्याखनय् कीर्तिलक्ष्मीया ब्याहा क्यनात्यल । अथे हे कीर्तिलक्ष्मी मिजंया वस: पुना: ल्वानाच्चंगु इलय् नं वयागु कपालय् मिसातसें तीगु सिन्ह बांलाक हे खने दु । सिन्ह हे तिकेमा:सा म्हालपतिंनं तिका तःगु सिन्ह जूसा ल्वइगु । गोरखा सेनातसें किपूमितय्गु न्हाय्थ्यंगु धइगु न्यनेदु । थ्व प्याखनय् अजःगु छुं नं क्यनातःगु मदु । थ्व नं सायद सेन्सरवोर्ड मतय्कूगु जक ख:ला ?

सुर्खेतय् नीस्वन, सुनसरी व मकवानपुरय् तःमुँज्यापाखें न्हूगु नेतृत्व



नेवा: पत्रकार राष्ट्रिय दबूया वइगु वैशाख ११ गते किपुलिइ जुइगु निक्वःगु तःमुँज्याया तयारीया भूवलय् थीथी जिल्लाय् अधिवेशन नापं जिल्ला कचा नीस्वनेगु ज्या तिब्र रुपं जुयाच्चंगु दु । थुगुसी तःमुँ तकया दुने देय्त्यंकं याना नीन्यागू जिल्लाय् कचा दयेकेगु जुइ धका: दबूपाखें जानकारी बिउगु दु । थ्व हे भूवलय् यें, यल, ख्वप व काभ्रे जिल्लाया अधिवेशन जुइ धुंकूगु दुसा स्वनिगःपिनेया जिलाय् नं अधिवेशन जुयाच्चंगु दु ।

नेवा: पत्रकारया सुर्खेत कचा

नेवा: पत्रकार राष्ट्रिय दबूया स्वनिगः पिनेया थीथी जिल्लाया अधिवेशन तिब्र रुपं न्ह्यानाच्चंगु जनाकारी बिउगु दु । दबूया केन्द्रीय नाय: श्रीकृष्ण महर्जन बियादीगु जानकारी कथं थौं सुनसरी जिल्लाया निक्वःगु अधिवेशन धरानय् जूवनाच्चंगु दु ।

उगु अधिवेशनं गुम्हेसिया ज्यासना पुच: ल्ययेगु ज्या जुइ । अथे हे कन्हय् शनिवा: मकवानपुरया निक्वःगु जिल्ला अधिवेशन हेटौँडाय् जूवनाच्चंगु दु । सुर्खेतय् वंगु बुधवा: नेवा: पत्रकारतय्गु छगू भेलापाखें नेवा: पत्रकार राष्ट्रिय दबू सुर्खेत कचा नीस्वंगु दु । सुर्खेत कचाय् जीवनकुमार शाक्य (स्वतन्त्र पत्रकार) नाय: जुयादीगु दुसा अथे हे न्वक्

नवीन शाक्य (रेडियो नेपाल), छयाञ्जेय् मिलन शाक्य (सुर्खेत पहिचान दैनिक) अथे हे दांभरीइ प्रवास कुमार शाक्य (डट त्रिरत्न डट कम अनलाईन पत्रिका) अथे हे दुजलय् सुरेश मानन्धर (स्वतन्त्र पत्रकार) व लतमान श्रेष्ठ शाक्य (डट त्रिरत्न डट कम अनलाईन पत्रिका) सर्वसहमतिं चयन जूगु दु ।

सुनसरीइ निक्वःगु तःमुँज्या

नेवा: पत्रकार राष्ट्रिय दबूया सुनसरी जिल्लाया निक्वःगु तःमुँज्या म्हिगः शनिवा: धरानय् जूगु दु । उगु तःमुँज्यां न्हूगु नेतृत्व ल्ययेगु ज्या जूगु दु । न्हूगु नेतृत्व कथं विनय प्रधान (एभिन्यूज) नाय: जुयादीगु दुसा न्वकू मन्जु शाक्य (कोशी साप्ताहिक), छयाञ्जे भोजराज श्रेष्ठ (ब्लाश टाइम्स न्हिपौ), ल्यूछ्याञ्जेय् सरोज श्रेष्ठ (धरान टाइम्स न्हिपौ) व दांभरीइ जमुना श्रेष्ठ (प्रमोद साप्ताहिक)यात ल्यःगु दु । दबूया केन्द्रीय न्वकू भोला श्रेष्ठया मूपाहांसुइ जुइगु उगु अधिवेशनं दुजलय् अनिल श्रेष्ठ (मर्निङ टाइम्स न्हिपौ), लक्ष्मण श्रेष्ठ (धरान एफ एम), रिमेश श्रेष्ठ (विश्वस्त सूत्र साप्ताहिक), विक्की श्रेष्ठ (औजार न्हिपौ), रश्मी प्रधान (विजयपुर साप्ताहिक) व आस्था पलिखे (विजयपुर एफ एम)यात ल्यःगु दु । अथे हे सल्लहकारय् याम प्रधान, विजय श्रेष्ठ,



सुनसरी जिल्लाय् अधिवेशन लिपा

आनन्द श्रेष्ठ, महेश श्रेष्ठ, भोला श्रेष्ठ, विमला शाक्य, मोहन श्रेष्ठ व निर्वतमान अध्यक्ष सोहन श्रेष्ठयात ल्यःगु दु ।

मकवानपुरय् न्हूगु नेतृत्व

नेवा: पत्रकार राष्ट्रिय दबू मकवानपुर जिल्लाया निक्वःगु तःमुँज्या शनिवा: हेटौँडा नगरय् जुल । पत्रकार दबूया केन्द्रीय नाय: श्रीकृष्ण महर्जनया मूपाहांसुइ जूगु उगु तःमुँज्यां न्हूगु नेतृत्व ल्ययेगु ज्या जूगु ख: । न्हूगु नेतृत्व कथं सुरेश श्रेष्ठ (समृद्ध समाज न्हिपौ)यात नाय: कथं ल्यःगु दु । अथे हे अशोक सुजन श्रेष्ठ (जगत टेलिभिजन)यात न्वकू, रंजिता डंगोल (रेडियो शक्ति)यात छयाञ्जे व रोजिन श्रेष्ठ (साभा कुरा न्हिपौ)यात दांभरी कथं ल्यःगु ख: । पत्रकार दबूया सल्लाहकार सुरेश किरण मानन्धर विशेष पाहां जुयादीगु उगु तःमुँज्यां अजिता नगरकोटी (रेडियो निकास), रोशन श्रेष्ठ (हेटौँडा न्हिपौ)यात दुज: कथं ल्यःगु ख:सा लिपा छम्ह दुज: मनोनित याइगु जूगु दु । दबूया यें जिल्लाया न्वकू रेखा शाक्य नं पाहां जुयादीगु उगु तःमुँज्यां अथे हे सल्लाहकारय् मोहनमान सांगामी (हेटौँडा वा:पौ), सुवर्णलाल श्रेष्ठ (इमेज च्यानल) व महेन्द्र श्रेष्ठ (पत्रकार महासंघ जिल्लाया नाय:)यात नं सल्लाहकार कथं ल्यःगु ख: ।

ब्बनामिया धा:पू

कवि राम महर्जनयात पौ

नेपाल सम्बत ११३६ चिल्लाख्व द्वादसि आइतवा: किपुलीं पिदनाच्चंगु छगूयां छगू जक नेपालभाषाया वा: पौ ज्वजलपा वा:पौ ब्बनेगु ह्व:ता: चूलात । उगु वा:पौलय् पिदंगु छिगु नेवा: दल दय्का वनेनु धयागु चिनाखँ जिगु ध्यान सालाकाल । छायधा:सा भी नेवा:त मिलय जुइमाल धयागु आजु तया: थ्व चिनाखँ च्वया दिगु जुयाच्चन । उकिं जि छिगु चिनाखँ ब्बने दया यक्व यक्व लय्ताना । थुज्व:गु चिनाखँ हानं हानं ब्बने दइगु आसा कया: च्वना ।

चिनाखँय् छत्वा: थथे दु
नेवा:त भीपिं मिले जुईमाल
नेवा:या संजाल फैलय् यायेमाल
नेवा: नं नेवा: थकाय् माल
तुति ज्वना सालेगु बानी त्व:तेमाल
नेवा:त भीपिं मिले जुईमाल धका:
पुस्तौ पुस्तानिसे हाला वयाच्चंगु ख: तर भीपिं थवं थवय् ल्वायेगु त्वतेमफु । छायधासा भी नेवा:तयगु नुग: तसकं हे चिधं । निगती खँय् भीपिं ल्वाय्गु याइ । नेवा: नं नेवा:यात सहयाई मखु । तर मेपिं खय् ब्रम्हुयात जूसा मानय् याई, छम्ह नेवा: नं मेम्ह नेवा: थाहां व:गु स्वये हे मफू धा:सा गथे याना संजाल फिजेयाई । न्हापा सरकारी जागिरय् गुलि नेवा:त दु आ: वया गथेजुया म्हो जुयावन ? नेवा: नं नेवा:यात सरकारी जागिर नकेत स्वसा थथे जुइला ? जागिर नकूम्हेसित हे जागिर नम्हं जागिरं हे लिकायत स्वइगु अले गथे याना: जागिर नकी ? भीगु सोच हे बाँमला: । अथेजुया भी नेवा:तय् न्हापालाक्क सकारात्मक सोच तयेमाला अले जक विस्तार जुइ ।

नेवा:तय्गु ल्हातय् नं राजकाज लाकेमाल
थ्व आजु पूर्वकेत नेवा: दल दयेके नु
चुनावय् नेवा: नेता थना भोट बिया
त्याके माल
नेवा:तय्गु ल्हातय् नं राजकाज लाकेगु तातुना नेवा: तय्गु हक अधिकारयात राजनैतिक रुपहे न्ह्यज्याकेत नेवा: तय्गु थ:गु हे पार्टीकथं नेपा: राष्ट्रिय पार्टी दकलय् न्हापां ने.सं.११२८ पोहेलाथ्व ६ कुन्हु विधिपूर्वक निर्वाचन आयोगय् दर्ता याना पार्टी स्थापना या:गु थन लुमंका: च्वना ।

नेपा: राष्ट्रिय पार्टी दर्ता जुइधुंका: पार्टीयात दकले न्हापांगु हाथ्या धैगु प्रष्ट यायेत भीसं संविधान सभाया न्हापांगु चुनावय् “भीगु थ:गु शासन नेवा: स्वशासन” व राष्ट्रिय एकताया आधार जातीय स्वशासन” धका: नारा बियागु जुल उकथं नेपा: राष्ट्रिय पार्टीयात ७४ जिल्लां ३९००० या ल्याखय् भोट व:गु जुल । उकथं समानुपातिक उम्मेदवार जुयादीम्ह भाजु बुद्ध सायमियात पार्टी सभासद पदय मनोनित यानाबिल ।

निक्व:गु संविधान सभाया चुनावं भाजु लक्ष्मण राजवंशीयात समानुपातिक उम्मेदवार पाखें त्याका संविधान सभाया सदस्य जुया च्वंगु दु धैगु छित म्हासिका: च्वना ।

बृहत नेवा: समिति दय्के माल
यें, यल, ख्वप, किपू सकभनं
थ्व खँयात व्यापक न्ह्याकेमाल
बृहत नेवा: समिति दय्केगु बिचा: कथं यें, यल, ख्वप, किपू सकभनं पार्टीया कचा निस्वना त:गु दु । भीपिं किपू लागायापिं जूगुलिं किपुली यागु खँ छत्वा:चा थन न्ह्यथने ।

किपुली नेपा: पार्टीयागु का संविधान सभाया लिपांगु चुनाव न्ह्यो गठन यानागु जुल अले चुनावय् पार्टीया पाखें प्रत्यक्ष उम्मेदवार भाजु कृष्णहरि महर्जन जुयादिगु ख:सा समानुपातिक उम्मेदवार रामभोला महर्जन जुइगु खँ छित थन तयाच्चना ।

गवले तक गैर नेवा:या भण्डा ज्वना
ज्यान पाना ब्वाँय् जुयाच्चनी
अवले तक भीपिं इमिगु वाउचा जुया
च्वनेमाली
ख:, थ्व धुव सत्य खँ ख:, किपु लागाय् जिं ब्वनागु खँकथं २००६ सालनिसें थन राजनीतिक गतिविधि जुयाच्चंगु ख: तर अक्तक थन पुरा मन्त्री सुं जुई मफु तर खय् बर्मुत थनं त्याना प्रधानमन्त्री तक जुल अले भीपिं वाउचा छाय् जुई म्वा:ली ?

थ:गु ल्हातय् छुं छुं मदय्का
ल्हा हुसुलुं प्वा: फूसलुं जुइका च्वनी
भीसं छु थुइकेमाल धा:सा
वाउचातय्त गुबलें च्वय्यागु पद बिइमखु, बिउसां व्वय्यागु पद जक बिई, भीत हेकेत धाप जक मारय् याना: हई अले भीपिं तितिं न्हू वई, नेवा: नं नेवा:यात भोट बिईमाल धा:सा भीत बिखण्डनकारी, देय् कृचा थलिपिं धका: व्विबई अले वहे खँ खय् ब्रम्हूतय्त हे भोट बिई । अले भीपिं थ:गु ल्हातय् छुं छुं मदय्का ल्हा हुसुलुं प्वा: फुसलुं जुइका छाय् मच्चनी ।

छि छम्ह नेवा: जुया पिहाँभाल । जिगु यक्व यक्व सुभाय, फुसा जिं छित ग्वाहालि बिई, मफुसा छित समर्थन याये, समर्थन नं याये मफुसा ब्व: चाहिं पक्का हे बिइमखु । थ्व जिगु बचन छित जुल । यदि छि नेवा: हे जुयाच्चना दिल धा:सा ।

रामभोला महर्जन
धुसि, पाँगा
थौकन्हे सालि, पाँगा

सु थ: सु कत:

सु थ: सु कत:
थ: कत:, कत: थ: जुयावइगु
दाजु किजा त:केहेपि
छम्ह मांया पुतापिं
मन स्यना कत: जुयावनिगु
म्ह मस्युम्ह गन, गन च्वंम्ह
थ:म्ह थ:त ययेका:
थ:यस्से राजि खुसी जुया
तिरिमय्जु जुईगु
अलय् म्हय् सास दतले
कत: थ: जुयाच्चनिगु
इलय् ब्यलय् परय्जुईवले
ग्वाहालि याईपिं
थ:त भिं जुयावइगु
अथे हे नापं देनिम्ह
थ:गु त्यपूयागु
तुति प्यंकेगु सहयाना च्वं थे
मेपिन्स याइगु
विलखिं सहयाये मफइगु
अलय् ज्याखँय् तत:मत
क्यंका चित्त बायका
थ: कत: जुया वनिगु
अयजुया सु थ: सु कत:



अशोक सोकी

अयजुया सकसितं थ: भा:पिया
थ: हे सकले भा:पिया
थ:गु रवाफ क्यना दुने कष्ट
प्वा:चिना च्वपिन्त न करुणाया
ज: न ज्ञान कना:
उइगु म्हायात याउक
बसन्तया सिचुगु
सिरसिर फसं गाना
बिइमा थयागु खँ कना
लुं यागु दरवार द:सां
राजा महाराजा जुसा
थ्व कायायात मायां त्व:ता
थ:त थम्हं माया यायेसयके
स्वर्गया उपाधीस्वया त:धंगु
श्रोतापती फल लायके सयके

थ्व खँ भीसं वा:चाय्के माल

प्रत्येक जनताया मने दुने
शान्तिं वास काय् मफया
सुख शान्ति मदया
मन सुकुसुकुं ख्वया च्वन
तापा:गु देशय् च्वपिं भुयुचात
भीथाय् वया मनदुथाय् चाहिला
यो योगु नया न्हिला न्हिला जुईफु
धेवा द:सा भीपिं नं जुइदैगु ख: तर..
भीपिं गरिव जुइमागु छु जुया
भीके ज्या मदु सरकार धापिसं
आ:तक जनतायात आर्थिक सम्पन्न
जुइगु ज्या मया:सेलि भीसं छुयाये
अले राणाधा:पिं व शाहवंश धा:पिं
सलंस: दँ राजकाज चलेया:पिं
सत्ताधारीत गरिव जुइगु गनं
राजनीति याना सत्ताय् वनीपिं हे धनि



कवि राम महर्जन

नगां, किपू-१६

निर्दं प्यदं राजकाज चलेया:पिं
नेतात हे करोडपति अरवपति
सलंस: दँ सत्ता चलेयापिं धनी छाय् मजुई
थ्व खँ भीसं वा:चाय्के माल
नेवा:त नं राजनीति दुहां वने हे मा:
न्ह्यावलें गैर नेवा:या ल्यूल्यू मखु
नेवा:या ब्यागलं शक्ति दय्के माल
नेवा:या ल्हातय् नं राजकाज लाकेमाल

नगां ज्ञानमाला भजन खल: नं ज्येष्ठ नागरिकपिन्त नमोबुद्ध चाहिकल



नगां ज्ञानमाला भजन खल: नगां या ज्येष्ठ नागरिक समितिया ग्वसालय् वंगु चैत्र १३ गते सनिवा: नगांया नगांया ज्येष्ठ नागरिकपिन्त काभ्रेया नमरा अर्थात नमोबुद्ध व नाला करुणामय चाहिकेगु ज्या यात ।

न्यादँ न्ह्य:निसें दँय् छक्व: जंकू यायेत्य:पिं व जंकूयाये धुं'कूपिं थकालिपिन्त थातुंथासय् चाहिइके याना वयाच्चंगु ख: । थ्वहे भवलय् म्हिग: शनिवा: उगु कथंया ज्याभव या:गु ख: ।

सुथसिया च्याता: इलय् नगांया बालकुमारी मन्दिर परिसय् मुना: ज्येष्ठ नागरिकपनिगु स्वास्थ्य जाँच या:गु ख: ।

प्रयास सामुदायिक स्वास्थ्य अध्ययन केन्द्रया स्वास्थ्यक:मिपिन्सं स्वास्थ्य जाँच यायेगुलि ग्वाहालि या:गु ख: । भिता: इलय् ज्येष्ठ नागरिकपिं पीम्ह ४०म्ह ति व ज्ञानमाला भजन खल:या ज: दुज: व स्वयंसेविका याना: ७० म्ह ति स्वंग: बसय् ज्वना: वंगु ख: ।

धुलिखेल पुला: वना: भतिचा जा:बलय् भासु लनेथें छथाय् चौरय् बस दिका: सकसित नं फलफुल व ल: त्वंकेगु यात । अनं घौछि लिपा नमोबुद्ध थ्यन । नमोबुद्धय् द: दर्शन याना: च्वय्च्वंगु ठाडगु टासी याडचे गुम्बाय् जलपान जुल । जलपान लिपा गुम्बाय् बुद्ध पुजा व पंचशील कायेगु ज्या जुल । अन हे गुम्बाया गुरु कर्मा



रिन्छेनया धर्म देसना लिपा थुगु ज्याभवलय् ग्वाहालि यानादीपिन्त सम्मान यायेगु ज्या नं जुल ।

बुद्ध पुजा क्वचाय्का गुम्बाया गुरुपिन्सं गुम्बाया भोजन गृहलय् भोजन याकेगु ज्या जुल । अनं लिहाँवया: नाला करुणामयया दर्शन या:वन । नकतिनि जात्रा सिध:गु इलय् जुया: नाला करुणामय नापं जात्रा

याइम्ह करुणामयया नं दर्शन याये खना: सकलें लयताल ।

थुगु ज्याभव: पूर्वकेया नितिं बसया व्यवस्थापन रमानाथ श्रेष्ठ, भोजन र तनदास महर्जन, विस्कट अष्टवहादुर महर्जन, मिनिरल वाटर हीरा डंगोल, वास: भिमसेन दास महर्जन, स्वास्थ्यकर्मि प्रेमदास, वासुदेव नेवा:, पिन्सं ग्वाहालि यानादीगु ख: ।



दैय् दसं जब चिल्लाथ्व अष्टमी वइ अबलेनिसं नेवा:तय्सं फागु सुरु जूगु कथं नाली अले फागु म्हेतेगु ज्या याइ । ससुद्य:याथाय पुजा आजा वना फागुया म्ये हालेगु नापं थवं थवय् न्ह्याइपुकेगु ज्या तकं याइ । अविरे इला न्ह्याइपुकेगु थुगु नख:यात नेवा:तय्सं थ:गु हे कथं हना वयाच्वंगु दु ।

होलीया मेला मयजु मस्यूला अविरे भच्चासां तये न्ह्या:ला थेंजा:गु बोलया म्ये हालेगुनिसं ल्यासे ल्याय्मह्या मतिनाया वर्णय यानात:गु नितिं न्ह्याइपुकेगु म्ये हालेगु तकं याइ । मेगु इलय् हाल धा:सा भच्चा छाडा जुइगु कथंया म्ये तकं होलीया इलय् हालेगु याइ । अले बुरापिन्सं तकं ल्यासेपिनिगु वर्णय याना म्ये हालेगु याइ । विशेष याना दाफा हालेगु इलय् नं अज्व:गु हे कथंया म्ये हालेगु याइ । मर्चानिसं बुद्धापिन्सं तकं अज्व:गु कथंया म्ये हालेगु याइ ।

वाउगु सिमाचव्य म्हासुम्ह भंग:चा

बासुरी पुया थें हा:वा रे हादे बोलया म्ये ला भन मर्चानिसं बुरापिन्सं तकं हालेगु याइ । अभ् खपय् ला भन मिजंया चिं व मिसाया चिंयात तकं पुजा यायेगु वर्णय यानात:गु म्ये हालेगु याइ । गुगु म्ये मेगु गुगु नं इलय् हालीमखु । होली अर्थात फागुया इलय् हाल धा:सा अशिलल कथं काइमखु ।

उकिं होली अर्थात फागु धइगु छगू कथं न्ह्याइपुकेगु अभ् ल्यासे ल्याय्महत नाप स्वापू दुगु अले र सरंग नापं यौवन नाप स्वापू दुगु नख:या रुपय् नालात:गु दु । म्ह छम्ह लखं लुना छगू कथं मिसापिन्त ग्यायमर खने दयेकेगु अले रंग इलेगु मिर्जपिं अस्य: जुया म्ये हालेगु व न्ह्याइपुकेगु नापं मिर्जपिं अस्य: जूसां सामान्य कथं काइगु ई धइगु हे होली अर्थात फागुया ई खः । फागु म्हेतेगु अर्थात होलीया मू दिं कथं नालात:गु दिं धइगु पुन्हि खः । उकियात फागु पुन्हि धाइगु खः ।



न्हापा न्हापा फागुन महिनाय् लाइगु पुन्हि जुया हे जुइ साय्द उगु पुन्हियात फागु पुन्हि धा:गु । ऋतु कथं पाना वने धुंकेगु जुया थौंकन्हय् चैत्र महिनाय् लानावंगु जूसां ऋतुया ल्याखं स्वयेगु ख:सा वसन्त ऋतुइ हे लाइगु पुन्हि खः ।

ऋतु नापया स्वापू

ऋतु धइगु मौसम कथंया ई खः । निला निलाया प्रकृतियात चित्रण याइगु ई हे छगू कथंया ऋतु खः । ऋतु दच्छिया दुने खुगू वइ । वसन्त ऋतु धइगु ऋतुत मध्ये नं दक्ले महत्वपूर्णगु अभ् धाये ऋतुतय्गु नं नेतृत्व यानाच्वंगु दु । वसन्त ऋतु धुंका: वइगु धइगु गृष्म ऋतु ख:सा अर्नलिपा छसिंकथं बर्षा ऋतु, ररद ऋतु, हेमन्त ऋतु व शिशिर ऋतु वइगु खः । वसन्त ऋतु धइगु प्राकृतिक रुपं नं सिमा कचा चुलुवइगु, सिरिसिरि फय् वइगु, वातावरण वाउसे च्वना वइगु, स्वां हवइगु, मन आनन्द जुइगु, यक्व ता:न्व: नं मखु चिकुगु नं मखु जुइगु अले न्ह्याइपुकेगु ऋतुया रुपय् नालात:गु दु । उकिं वसन्त ऋतुया इलय् छगू कथं ल्यासे ल्याय्महतय् नुग: चचं धायावइ धइ । अभ् नेवा: समाजय् वसन्त ऋतुया इलय् कला भातयात फाये मत्य: धाइ । उकिया अर्थ निम्ह नापं च्वनेमा:गु नापं निम्हेसिया दथुइ यौवन स्वापू भन क्वातुकेगु ई धका: धाइ ।

वसन्तपुलिइ चीर स्वाइगु

चीर स्वाइगु महिना जुया नेपाल संवतया तिथि कथं चिल्ला धा:गु वा चिल्ला महिनाय् वसन्तपुलिइ स्वाइगु जुया चीर धा:गु जुइफु । थ्व निगू न्ह्यागु हे जूसां आखिर चीर स्वाइगु व चिल्ला नाप स्वापू दयाच्वंगु खने दु । चिल्लाथ्व अष्टमी कुन्हु येंया वसन्तपुलिइ चीर स्वाइगु चलन दु । चीर स्वाइगु धइगु वसन्तपुय् लैय् च्वंगु गालय् मेलया पंम्हा धंकेगु खः । उगु पं धइगु गुहेश्वरी लागाय् च्वंगु जंगलय् दुगु मयल म्हाया पं खः । उगु पंम्हय् स्वतजा: जुइक स्वचा: तया थीथी रंगीचंगी काप: खाया तइगु खः । तसकं हिसिचा दयेका पथय् कापतं भुना रंगचंगी काप घाना तइगु पंयात हे गालय् क्वाफाइगुयात चीर



स्वाइगु धाइगु खः । अथे चीर स्वायेगु ज्या धा:सा साइतय् हे यायेमा:गु चलन दु । चीर स्वायेगु ज्या धालासिको मानन्धर सना गुथिपाखें याइगु खः । पथय् रंगीचंगी काप: धायेगु ज्या धा:सा कौपीतोष नानापाखें याइगु खः । साइतय् हे चीर स्वाये धुनेवं अन रंग इला म्हेतेगु ज्या नं याइ । अले चीर स्वायेगु ज्या जूसानिसं हे होली अर्थात फागु सुरु जुल धका: सर्वसाधारणतय्सं नाला काइगु खः ।

अथे हे हनुमानध्वाखाया दाख चुकय् नं चीर स्वायेगु धका: मयल म्हाया सिमाकचा धंका: उकिइ रंगीचंगी काप: धायेगु अले अविरे छ्वाका तयेगु इ । उगु हे कथं हनुमानध्वाखाया न्ह्य:ने नापं मसान चुकय् व मोहनकाली चुकय् नं अथे हे मयलम्हाया कचा धंका: उकिइ रंगीचंगी काप: धायेगु याइ । उकियात हे चीर स्वायेगु धया वयाच्वंगु दु ।

कृष्ण व गोपीनीतयगु मूर्ति प्रदर्शन

येंया हनुमानध्वाखा लागय् हे च्वंगु मोहनकाली चुकय् फागु पुन्हिया भुवलय् कृष्ण द्य: नाप नापं गोपीनीतय्गु मूर्ति ब्वज्या याइगु चलन दु । मेगु इलय् खनी मखूगु उगु कथंया मूर्ति ब्वज्या चीर स्वाइगु दिनिसं फागु पुन्हि तक याइगु खः । लं फिकामत:गु कथंया च्याम्ह मिसापिनिगु मूर्ति नापं कृष्ण बासुरी पुयाच्वंगु मूर्ति प्रदर्शनय् तइगु खः । थ्व धइगु कृष्णलिला नाप स्वापू दुगु कथं नालात:गु दु ।

अजूचाइपुगु जात्रा

खपया नेवा:तय्सं ला होलीया इलय् भन मिजंया चिं व मिसाया चिं (लिड व योनी) या प्रतिक दयेका जात्रा यायेगु तकं यानाच्वंगु दु । मिसाया चिं व मिजंया चींयात तया अजूचाइपुक जात्रा याइगु खपय् निगू थासय् दु । चीर स्वाइगु अष्टमी खुन्हु कमल विनायकय् लिडयात सिला अर्ननिसं लिड व योनीया जात्रा याइगु खः । बाजं थाना यंका: जात्रा देय् चा:हिइका अनया

दतात्रयया न्ह्य:ने च्वंगु भिंद्य:या फल्वाय् तया तइगु खः । अले उकियात हे द्य: भा:पिया भागी याइगु खः । अथे योनी व लिडयात तयात:गु थासय् संकीगु इलय् छगू कथं समागमन जूगु कथंया चित्रण जुइगु कथं य:खाया तइगु खः । अथे फल्वाय् पुन्हि कुन्हु तक तया पुन्हि कुन्हु हे च्याम्हसिम्ह पुखुलिइ यंका क्वाचायेकीगु चलन दु । खपया स्थानीय मनूतय्सं लिडयात भिंद्य:या लद: धायेगु याना वयाच्वंगु दुसा योनी आकार जुइक काप: तया दयेकात:गुयात चीर धाइगु खः । उकिं व निगू हे स्वाका: तइगुयात हे चीर स्वायेगु खः धायेगु याना वयाच्वंगु दु ।

अथे हे खपया हे य:सिंख्य:या लिक्क च्वंगु गय् भिंद्य:याथाय् नं अज्व:गु हे कथं फागु पुन्हि खुन्हु ब्वया तइगु चलन दु । अले फागु पुन्हि खुन्हु हे उकियात वजागाजा सहित जात्रा याइगु खः । उगु इलय् गुथियारतय् भ्वय् हे नयेमा:गु चलन दु ।

त्यंकं बाखं नाप स्वा:गु खँ

न्हापांगु बाखं: होली अर्थात फागुयात थीथी कथंया हिन्दू धर्म नाप स्वापू दुगु त्यंकां बाखं नाप स्वाकात:गु खने दु । हिरण्यकश्यपुरया केहँ होलीका ख:सा हिरण्यकश्यपुर राक्षस कुलयाम्ह जूसां वयक:या काय प्रल्हाद धा:सा विष्णु भगवनाया भक्त जुयाच्वन । थीथी कथंया कुत: याना नं प्रल्हादयात विष्णु भगवनाया भक्त याये मफूगुलिं मिं छुं मजुइम्ह होलीकां प्रल्हादयात ज्वना मिं क्वाहां वंगु अवस्थाय् विष्णुया भक्तिभावं प्रल्हाद छुं नं मजूगु तर होलीका च्याना खरानी जूगु घटना नाप स्वाका नं होली धका: धायेगु व नख:या रुपय् हना वयाच्वंगु खने दु ।

निगूगु बाखं: द्य:पिं व दैत्यतय्गु दथुइ ल्वापु जुयाच्वंगु अवस्थाय् महाद्य: तपश्या च्वनाच्वंगु अले उगु इलय् महाद्य:या साथ कायेगु नितिं महाद्य:या तपस्या भंग यायेमा:गु जुयाच्वन । उकिं



कामदेवं वानं क्ययेकल अले वानया सलं महाद्य:या तपश्या भंग जूगु अवस्थाय् महाद्य:या स्वंग:गु मिखां स्वयेवं मिं पिहां वया कामदेव भष्म जुल । थ: भात भष्म जूगुलिं र तीदेवीं महाद्य:या भक्ति याना हाकनं कामदेवयात म्वाकाबिल । व ई धइगु वसन्त ऋतुया ई जुया उगु इलय् कला भात फाये मत्य: धका: धा:गु बाखं दु ।

स्वंगूगु बाखं: गापीनीत नागां जुया खुसिइ क्वाहां वना म्व: ल्ह्याच्वंगु अवस्थाय् भगवना कृष्ण वना वस्त्र हरण यात । वस्त्र हरण याना सिमाय् खाया बिल । अले गोपीनीतय् तसकं ज्या मछिना आर्वील नांगा जुया म्हो ल्हुइमुखु धका: बचं बिल धाइगु दु । उकिं हे चीरय् थीथी कथंया रंगीचंगी काप: तयेगु याना वयाच्वंगु खः धाइ ।

थीथी कथंया बाखं दुगु जूसां अले न्ह्यागु हे जूसां आखिर वसन्त ऋतुया इलय् वइगु नख: हे फागु अर्थात होली खः । थुगु नख: धइगु यौवन नाप स्वापू दु । प्रकृति नाप स्वापू दुगु अले न्ह्याइपुकेगु नख: फागुयात विशेष यान ल्यासे ल्याय्महतय्सं तसकं ययेकीगु नख: खः । यौन नाप नं स्वापू दुगु फागुयात नेवा:तय्सं नं थ:गु जनजीवन नाप स्वाका: हना वयाच्वंगु खने दु ।



श्रद्धाया स्वां देह्याया



जन्म: २०१४/१०/२०

स्व.रामशंकर महर्जन

निधन: २०७२/१२/०२

जिमि सकसियां न्हियान्हिथं लुमंके बहःम्ह व हनेबहःम्ह जिमि दाजु/ किजा
रामशंकर महर्जन वंगु चैत्र २ गते ५८ दँया उमेरय् मत्यवं मदुगु थौं भिंस्वन्हुया
 पुण्य तिथिसं मदुम्हेसिया आत्माया चिर शान्तिया कामना यासैं सुखावति भुवनय्
 बास लायेमा धइगु कामना याना श्रद्धाया स्वां देह्याना च्वना ।

उज्याल / प्रमेन्द्र महर्जन
 राधेश्याम / हिरा महर्जन
 पुरुषोत्तम / शिशु महर्जन
 सिरिसा महर्जन

प्रभा लक्ष्मी / अर्जुन महर्जन
 अन्जिस महर्जन
 एलेक्स महर्जन

मिना कुमारी / डा. महेन्द्र महर्जन
 मनोज्ञा महर्जन
 प्रज्ञा महर्जन
 मिजेन महर्जन

नन्दकुमारी / मर्जिमान सिं
 अनन्त मान सिं
 अमन मान सिं

रोशनी / नवीन बज्राचार्य
 नसना बज्राचार्य

लक्ष्मी कुमारी / ज्ञानमान महर्जन
 ज्ञानेन्द्र / कविता (बहिनी) महर्जन
 नरेन्द्र / विनामती महर्जन
 नरेश / सनी महर्जन

विष्णुमाया / विनयलाल डंगोल
 ओसिस डंगोल

लक्ष्मी महर्जन
 किशोर / संगिता महर्जन
 रामेश्वर / रजला महर्जन

मसला नानी / हरिनारायण महर्जन
 ममता महर्जन
 सोनिमा महर्जन
 जेनिका महर्जन

सविता / दिपेन्द्र महर्जन
 दीपशिखा महर्जन

संगिता / राजेन महर्जन
 सजेन महर्जन